

थेसलोनिकेय् च्वंगु मण्डलीयात पावलं च्वःगु न्हापांगु पौ म्हसीका

थेसलोनिके रोमी साम्राज्यया छगू देश माकेडोनियाया राजधानी खः। फिलिप्पी शहरं वयाः पावलं थन नं मण्डली दयका थकूगु खः।

यक्व हे यहदी धर्म मानय् याये मास्ति वय्काच्चंपि यहदीमखुपिन्सं नं पावल्यागु भिंगु खँ न्यनाः विश्वास याःगुलि यहदीतयसं नुगः मुइकाः वयागु विरोध याना जुल। अयजूगुलि पावल अनं बेरिया धाःगु शहरय वन। अनं लिपा व कोरिन्थय वन। अन वं व नाप ज्या याइम्ह तिमोथीपाखें थेसलोनिकेय् च्वंगु मण्डलीयागु खँ सीकल।

पावलं थेसलोनिकेय् च्वंपिन्त च्वःगु थ्व न्हापांगु पौ खः। अन च्वंपि विश्वासीतयसं क्वात्तुक विश्वास यानाच्चंगु व थःथवय् माया यानाच्चंगु खँ न्यनाः तसकं लय्तायाः पावलं थ्व पौ च्वःगु खः। वं इमित अज्ज नं विश्वास या, साहस का, अले थःगु चालचलन नं अथे हे याना च्वँ धकाः अती बियाच्चंगु दु। अले इमिसं न्यनाहःगु प्रभु झाइबलययागु खँयागु लिसः नं बियातःगु दु। प्रभु हानं झाइतिनि धयागु खँय् आशा यायेगु मत्वःतुसे थःपिनिगु ज्या बांलाक याना च्वँ धकाः नं पावलं अती बियातःगु दु। पावल स्वंगू हप्ताति जक थेसलोनिकेय् च्वंगु खः।

धलः पौ

न्ह्यखँ १:१

सुभाय् व प्रार्थना १:२-३:१३

विश्वासीतयगु चालचलनया बारे अती ४:१-१२

ख्रीष्ट झाइतिनि धयागु खँ ४:१३-५:११

दक्वसिबय् लिपांगु अती ५:१२-२२

क्वचाय्कूगु ५:२३-२८

१ थेसलोनिकी

पावलपाखें ज्वजलपा

1 झी परमेश्वर बा: व प्रभु येशू ख्रीष्टयागु थेसलोनिकेय् च्वंगु मण्डलीयात पावल, सिलास व तिमोथीयापाखें ज्वजलपा। छिमित दया माया व शान्ति दयेमा।✧

थेसलोनिकेय् च्वंपिनिगु विश्वास

2 प्रार्थना यायेबलय् जिमिसं न्ह्याबलें छिमित लुमंका: परमेश्वरयात सुभाय् बियाच्चवनागु दु।

3 परमेश्वर बा:या न्ह्य:ने छिमिसं विश्वास या:थें ज्या यानाच्च्वंगु, थ:थवय् माया याना: अज्ज अप्व: मन तथा: प्रभुया ज्या यानाच्च्वंगु व आशा मत्व:तुसे प्रभु येशू ख्रीष्टयात क्वातुक विश्वास यानाच्च्वंगु खँ जिमिसं लुमंकाच्चवनागु दु।

4 परमेश्वरयात य:पिं दाजुकिजापिं, वय्कलं छिमित ल्ययादीगु ख: धका: जिमिसं स्यु।

5 छायाधा:सा जिमिसं छिमित न्यंकागु वचन म्हुतुं जक न्यंकागु मखु, बरु शक्ति व पवित्र आत्मापाखें व दुनुगलंनिसें हे न्यंकागु ख:। छिपिनाप च्वनाबलय् जिपि गज्या:पिं ख: धका: ला छिमिसं सि हे सिल।

6 छिमिसं उलिमछि दु:खकष्ट जुल नं पवित्र आत्मां याना: भिंगु खँ न्यना: विश्वास यात। थुकथं छिपिं जिमिसं व प्रभुं यानादी थें याइपिं जुल।✧

7 अथे जगुलिं छिपिं माकेडोनिया व अखैयाय् च्वंपिं विश्वासीतयगु निंति नमूना थें जुल।

8 छिमिसं प्रभुयागु वचन माकेडोनियाय् व अखैयाय् जक न्यंकूगु मखु, बरु छिमिसं परमेश्वरयात विश्वास या:गु खँनापं न्यंकभनं बयबय् जगु दु। थ्व खँय् जिमिसं छुं हे धया च्वनेमा:गु मदु।

9 जिपिं छिमिथाय् वयाबलय् छिमिसं जिमित गुकथं लसकुस यात अले धात्थेंयाम्ह व म्वा:म्ह परमेश्वरयात सेवा यायेत छिपिं गुकथं मूर्ति पुजा यायेगु त्व:ता: परमेश्वरपाखे फहिला वल धयागु खँ फुक्कसिनं धयाच्च्वंगु दु।

10 छिमिसं परमेश्वरया काय् स्वर्गं झाइतिनि धका: लँ स्वयाच्च्वंगु दु हं। वय्क: परमेश्वरं सीम्हं म्वाकादीम्ह येशू ख:। न्याय याइबलय् वय्कलं झीत बचय् यानादी।

2

थेसलोनिकेय् पावलयागु ज्या

1 दाजुकिजापिं, जिपिं आमकन वयागु सिंति मवं धका: ला छिमिसं सि हे स्यु।

2 आम्कन वये न्ह्यः फिलिप्पी च्वंपिन्सं जिमित दुःख बियाः नं जिमिगु इज्जत तकं काल धकाः ला छिमिसं सि हे स्यू। अयनं परमेश्वरं जिमित साहस बियादीगुलि जिमिसं न्ह्याक्व हे विरोधीत दःसां छिमित भिंगु खँ न्यंकेगु मत्वःता।☆

3 जिमिसं छिमित न मखुगु खँ हे स्यनागु खः, न मभिंगु मतिइ तयाः हे स्यनागु खः, न सुयातं झंगःलायत हे स्यनागु खः।

4 परमेश्वरं हे जिमित विश्वास यानाः भिंगु खँ न्यंकेगु ज्या लःल्हानादीगु खः। जिमिसं मनूतयत मखु, बरु जिमित जाँचय् यानादीम्ह परमेश्वरयात लयताय्केत नवानाच्चवनागु खः।

5 छिमिसं सि हे स्यू, जिमिसं छिमिके ह्यय्का कायेत स्वयागु नं मदु, अले न छुं काये दइ धकाः हे जिमिसं लोभ यानागु दु। परमेश्वर साक्षी दु।

6 छिमिसं व मेपिन्सं नं जिमित तःधंकेमाः धकाः जिमिसं धयागु मदु।

7 खः ला, ख्रीष्टया प्रेरित जूगुलि जिमिसं थथे याये फुगु खः। अयनं जिमिसं छिमित मानं मस्तयत सुसाःकुसाः याः थें तितिपापा याना तया।

8 जिमिसं छिमित धात्थें हे माया यानाच्चवनागु दु। परमेश्वरयागु भिंगु खँ जक मखु, छिमित थःगु प्राण तकं बी माःसां जिमिसं लिफः स्वये मखु, छाय्धाःसा जिमित छिमिगु तसकं माया वं।

9 दाजुकिजापि, जिमिसं यक्व दुःखकष्ट सियाः ज्या यानागु ला छिमि लुमं हे जुइ। भिंगु खँ न्यंकः वयाबलय् जिमिसं छिपि सुयातं थाकु मजुइमा धकाः चान्हि मघंसे ज्या याना।

10 छिपि साक्षी हे दु, विश्वासीतयूगु न्ह्यःने जिमिसं पवित्रकथं, धार्मिकताकथं व छुं दोष मदय्क गुलि बांलाक व्यवहार यानाः छिमिसं सि हे स्यू, अले परमेश्वरं नं स्यू।

11 बौनं थः मस्तयत गथे याना तइ, अथे हे जिमिसं नं छिमित याना तया।

12 छिमिसं परमेश्वरयात यःथें याना जुइ फयेमा धकाः जिमिसं छिमित गुलि अतीं व साहस बिया। वय्कलं हे छिमित थःगु राज्यय् दुकायेत व तःधंकेत सःतादीगु खः।

13 जिमिसं परमेश्वरयागु वचन न्यंकाबलय् छिमिसं थुकियात मनूतयगु वचन मखु, परमेश्वरयागु हे वचन खः धकाः न्यना काल। धात्थें हे थ्व परमेश्वरयागु वचन खः। अले थ्व हे वचनं छिमिगु नुगलय् हा कयाच्वंगु दु। उकिं जिमिसं परमेश्वरयात न्ह्याबलें सुभाय् बियाच्चवनागु दु।

14 दाजुकिजापिं, ख्रीष्ट येशूयात विश्वास यानाच्वंपिं यहूदियाय् च्वंगु मण्डलीयापिन्सं थें छिमिसं नं दुःखकष्ट सियाच्वंगु दु। इमित गथे यहूदीतय्सं दुःख बियाच्वन, छिमित नं अथे हे छिमिगु देशय् च्वपिन्सं दुःख बियाच्वंगु दु।*

15 व हे यहूदीतय्सं प्रभु येशू व न्हापायापिं अगमवत्तातयत् स्यानाबिल। अले जिमित नं ख्यानाः हल। परमेश्वरयात मयःगु ज्या यानाः इपिं न्ह्याम्हय्सियां विरोधी जुयाच्वन।*

16 इमिसं जिमित यहूदीमखुपिन्त मुक्तियागु खँ न्यके हे मन्व्य। इमिसं थुकथं पाप मुंकाच्वन। उकिं इमिसं लिपा तकं परमेश्वरयागु तं फया च्वनेमाली।

पावलं हानं थेसलोनिकेय वने मास्तिवय्कूगु

17 यःपिं दाजुकिजापिं, छिपिलिसे बायाः पलख ख्वाः स्वये मखंसां नुगलं ला बायाच्वनागु मदु। छिमिथाय् हाकनं वयेत जिमिसं तसकं कुतः यानाच्वनागु दु।

18 जिपिं छिमिथाय् वयेत स्वयाच्वनागु दु। जि पावल ला ग्वःकःमछि वयेत स्वये धुन। अयुनं शैतानं जिमित वयके हे मबिल।

19 जिमिगु आशा धाःसां, जिमिगु लयताः धाःसां, अले झी प्रभु येशू ख्रीष्ट झाइबलय् जिमि छ्यं धस्वाकेगु श्रीपेच धाःसां छिपिं हे, मखु ला?

20 जिमिगु लयताः धाःसां, जिमिगु छ्यं धस्वाकीपि धाःसां छिपिं हे खः।

3

तिमोथीयात थेसलोनिकेय् छ्वःगु

1 छिपिंनाप तापाना च्वने मफुगुलि जिमिसं तिमोथीयात छिमिथाय् छ्वया हयाच्वनागु दु। जिपिं जक एथेन्सय् हे च्वनाच्वनेगु भिं ताल।*

2 छिमित साहस बीत व विश्वासय् बल्लाकेत जिपिं नाप भिंगु खँ न्यंका च्वंम्ह परमेश्वरया सेवा याइम्ह किजा तिमोथीयात छिमिथाय् छ्वयाहयागु खः।

3 थज्याःगु दुःखकष्ट खनाः ग्यानाः छिपिं सुं नं लिचिले मते। थज्याःगु दुःखकष्ट ला झीत व हे वइ धकाः छिमिसं सि हे स्यू।

4 छिपिंनाप दुबलय् हे जिमिसं छिमित थज्याःगु दुःखकष्ट वइ धकाः धयागु खः। जिमिसं गथे धया अथे हे जुल।

* 2:14 २:१४ प्रे १७:५

* 2:15 २:१५ प्रे ९:२३,२९; १३:४५,५०; १४:२,५,१९; १७:५,१३; १८:१२

* 3:1 ३:१ प्रे १७:१५

5 अयज्जगुलि हे जिं थःत पी मफयाः शैतानं छिमित पापय् लाकाः जिमिगु ज्या सिर्ति वन ला धकाः ग्यानाः तिमोथीयात छिमिथाय् स्वके छवयाहयागु खः।

तिमोथीं लिहां वयाः खँ कंगु

6 आः नकतिनि हे जक तिमोथी छिमिथासं थन थयंकः वल। छिमिगु विश्वास व माया अज्ज नं बल्लानाच्चंगु दु धकाः लय्ताय् बहःगु खँ कन। जिमिसं थें छिमिसं नं जिमित लुमंकाच्चंगु दु, अले जिमिगु ख्वाः स्वये आपुलु जुयाच्चंगु दु धकाः नं वं कन।*

7 दाज्जुकिजापिं, छिमिगु विश्वासयागु खँ न्यनाः थज्याःगु दुःखकष्ट जुयाच्चन नं जिमित लयताः वल।

8 छायाःसा छिमिसं थथे प्रभुयात क्वातुक विश्वास यानाच्चंगु खँ न्यनाः म्ह हे याउंसे च्वन।

9 छिमिसं यानाः हे जिपिं परमेश्वरया न्ह्यःने लयतायाच्चने फइ। छिमिगु निंति परमेश्वरयात न्ह्याक्व सुभाय् ब्यसां गाइ मखु।

10 चान्हिं जिमिसं दुनुगलंनिसें आम्कन वये दयेमा धकाः परमेश्वरयाके फ्वनाच्चनागु दु। थुकथं छिमिगु विश्वासय् मगाः मचाःगु नं तना बीदइगु खः।

11 झी परमेश्वर बाः व प्रभु येशू हे जिमित आम्कन वयेत लँ चाय्का बियादीमा।

12 जिमिसं छिमित माया याना थें प्रभुं छिमित नं थःथवय् व मेपिन्त माया यानाः न्ह्यज्याये फय्कादीमा।

13 प्रभु येशू थः मनूत नाप झायादीबलय् परमेश्वर बाःया न्ह्यःने दोष मदुपिं व पवित्र जुया च्वनेत वय्कलं छिमित बल्लाकादीमा।

4

परमेश्वरयात यय्क म्वायेगु

1 दाज्जुकिजापिं, परमेश्वरयात यय्क गथे यानाच्चनेमाः धयागु खँ ला छिमिसं जिमिगुपाखें स्यना काये धुंकूगु हे दु। छिपिं उकथं हे जुयाच्चंगु नं दु। छिपिं थुकथं हे अज्जं न्ह्यज्यानावने फयेमा धकाः जिमिसं छिमित प्रभुया नामं बिन्ति यानाच्चनागु दु।

2 जिमिसं स्यना थकागु वय्कःयागु अधिकारयागु खँ छिमिसं सि हे स्यू।

3 छिपिं पवित्र जुयाच्चनेमा धयागु हे परमेश्वरया इच्छा खः, उकिं छिपिं व्यभिचारं तापाक च्वेँ।

- 4 छिपि फुक्कसिनं थः कलाःलिसे पवित्र जुयाः बांलाक हना च्वनेमाः।
 5 परमेश्वरयात महमस्यूपि थें मभिंगु मतिइ तयाः मखु।
 6 थ्व खँय् सुनानं थः दाजुकिजापिन्त स्यके मते। परमेश्वरं थथे याइपिन्त तःधंगु सजॉय बियादी। जिमिसं न्हापा हे छिमित थ्व खँ बांलाक धायेधुन।
 7 परमेश्वरं झीत अशुद्ध जुइत मखु, बरु पवित्र जुइत सःतादीगु खः।
 8 उकिं सुनां थ्व खँ न्यनी मखु वं मनूयागु मखु, बरु छिमित पवित्र आत्मा बियादीम्ह परमेश्वरयागु हे खँ मन्यंगु जुइ।
 9 आः छिमित थःथवय् माया यानाच्वनेमाः धकाः जिमिसं च्वया च्वनेमाःगु मद्दु, छायाःसा थ्व खँ ला छिमित परमेश्वरं हे स्यनादीगु दु।
 10 अथे ला छिमिसं माकेडोनियाय् च्वंपि दाजुकिजापिन्त धात्थें हे माया यानाच्वंगु दु। छिपि अज्ज नं थुकथं हे न्ह्यज्याना हूँ धकाः जिमिसं छिमित धयाच्वनागु दु।
 11 जिमिसं छिमित न्हापा हे धया थें सुं लिसे हाला जुइ मते, थःगु ज्या मन तयाः या, अले थःगु हे ल्हातं ज्या यानाः नयेगु कुतः या।
 12 थथे याना जूसा छिमित मेपिन्सं नं हनाबना तइ। अले थःत मालीबलय् सुयागु नं ख्वाः स्वयाच्वने माली मखु।

प्रभु झायानीबलय् छु जुइ?

- 13 दाजुकिजापि, सी धुंकूपि विश्वासीतय्गु खँ नं छिमित कने। आशा मद्दुपि मनूतय्सं थें छिमिसं नुगः मछिंके मते।
 14 येशू सिनाः हानं म्वानावल धकाः ला झीसं विश्वास यानाच्वनागु दु। अथे हे वय्कःयात विश्वास यानाः सिनावंपि मनूतय्त येशू नाप परमेश्वरं ब्वना यंकादी धकाः नं झीसं विश्वास यानाच्वनागु दु।
 15 प्रभुं धयादी थें जिमिसं स्यनाच्वनागु खः। प्रभु झायानीबलय् झीपि म्वानाच्वंपिन्सं सी धुंकूपिन्त गुगुं कथं नं लिलाके फइ मखु।
 16 प्रभु स्वर्गं क्वहां झाइबलय् तस्सःगु सः ताये दइ, तःधंम्ह स्वर्गदूत हाला हइ, अले परमेश्वरयागु तुरही पुया हइ। उबलय् हे ख्रीष्टयात विश्वास यानाः सीपि मनूत न्हापालाक म्वाना वइ।
 17 थ्व हे इलय् तक म्वानाच्वंपि नं इपि नाप तुं प्रभुयात आकाशय् नापलायेत सुपाँचय् थाहां वनी। थुकथं झीपिं सदां प्रभु नाप च्वने खनी।✧
 18 अयजूगुलि थःथवय् थ्व खँ कनाः साहस बीगु याना च्वँ।

5

प्रभुयागु लँ स्वयाच्चँ

1 दाजुकिजापि, प्रभु थुखुन्हु थुबलय् झाइ धका: छिमित च्वया च्वनेमा:गु मद्दु,
2 छायाधा:सा प्रभु झाइगु ई चान्हय् खुँ वये थें थ्यंक: वइ धका: ला छिमिसं सि
हे स्यू।

3 मनूतयसं प्यखें “शान्ति दु, ग्याये मा:गु मद्दु” धया च्वनीबलय् लाक्क हे इमिके
प्वाथय् दुम्ह मिसायात मचाबुइ ब्यथा जू थें आकाझाकां विनाश जू वइ। अले इपि
छुं याना: नं बचय् जुइ फइ मखु।

4 छिमित धा:सा प्रभु झाइगु ई खुँ व: थें जुइ मखु, छायाधा:सा छिपि खिउँथाय्
च्वनाच्चंगु मद्दु।

5 छिपि न्हिया जलय् च्वनाच्चंपि ख:। झीपि चाया खिउँथासय् च्वना च्वनापि
मखु।

6 अयजूगुलि झीपि मेपि थें न्ह्यलं ब्वाना च्वने मजिल, बरु होश याना: न्ह्यलं
चाय्का च्वनेमा:।

7 घनीपि नं चान्हय् हे घनी, अले अय्ला:गुलुतयसं नं चान्हय् हे त्वनाजुइ।

8 झीपि जलय् च्वनीपि जूगुलि झीसं थ:त क:घाना च्वनेमा:। झीसं ला विश्वास
व मायायात छातिइ चीगु नँयागु पाता थें चिना तयेमा: अले मुक्तियागु आशायात
तपुलि थें पुया च्वनेमा:।

9 परमेश्वरं झीत सजाँय बीत स:तादीगु मखु, बरु झी प्रभु येशू ख्रीष्टपाखें मुक्ति
बीत स:तादीगु ख:।

10 वय्क: झीगु निति सिनादिल। अयजूगुलि प्रभु लिहां झाइबलय् झीपि म्वाना
च्वंसां, सी धुंक्सां वय्क: नाप च्वने दइ।

11 उकि छिमिसं आ: थें तं थ:थवय् साहस बिया: बल्लाका च्वनेगु याना च्वँ।

मेमेगु अती

12 दाजुकिजापि, छिमित जिगु बिन्ति दु – छिमिथाय् ज्या यानाच्चंपि, छिमित
स्यनेकने याइपि थकालिपिन्त हनाबना तयेगु या।

13 इमिसं यानाच्चंगु ज्यां याना: इमित दुनुगलंनिसें माया याना: हनाबना तयेगु
या। अले थ:थवय् नं मिलय् चले जुयाच्चँ।

14 जिं छिमित हानं धाये – अल्छीतय्त् ब्व:ब्यु, नुग: क्वतुपिन्त ह:पा ब्यु,
बमला:पिन्त ग्वाहालि या, अले न्ह्याम्हय्सिनं न्ह्यागु धा:सां सह यानाच्चँ।

- 15 मभिंगुया पलेसा मभिंगु तुं याये मते, बरु थःथवय् व न्ह्याम्हय्सित नं न्ह्याबलें भिंका जुइगु कुतः या।
- 16 न्ह्याबलें लयताया च्वँ।
- 17 न्ह्याबलें प्रार्थना याना च्वँ।
- 18 न्ह्यागु खँय् न्ह्यागु जूसां परमेश्वरयात सुभाय् बियाः च्वँ। ख्रीष्टयात विश्वास यानाः छिमिसं थथे यायेमा धयागु हे परमेश्वरयागु इच्छा खः।
- 19 पवित्र आत्मायागु इच्छायात त्यलेत स्वये मते।
- 20 अगमवाणीयात क्वथुनाः खँ ल्हाये मते।
- 21 न्ह्यागु खँयात नं बांलाक वाला स्वयेगु निं या। अले भिंगु खँ जक ल्यया का।
- 22 फुक्क कथंयागु मभिंगु खँपाखें तापाक च्वँ।
- 23 झीत शान्ति बियादीम्ह परमेश्वरं हे छिमित पवित्र यानाः प्रभु येशू ख्रीष्ट झाया मदितले छिमिगु आत्मा, प्राण व म्हयात दोष मदयक तयादीमा।
- 24 छिमित सःता दीम्हय्सिनं हे थ्व फुक्क यानादी, छायाःसा वय्कः विश्वास याये बहःम्ह खः।
- 25 दाजुकिजापि, जिमिगु निति प्रार्थना या।
- 26 दाजुकिजापि सकसिनं थःथवय् यच्चु नुगलनिसें माया यानाः ज्वजलपा यायेगु या।
- 27 दाजुकिजापि, सकसितं थ्व पौ ब्वना न्यंकाब्यु धकाः जिं छिमित प्रभुयागु नामं बिन्ति यानाच्वना।
- 28 झी प्रभु येशू ख्रीष्टया दया माया छिमिके दयेमा।

Newar
Newar: Newar (Bible)

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 16 May 2025 from source files
dated 17 May 2025

838cc630-4ccf-5055-be45-10a98a141cc7